

\*索隐张晏曰：“时天下未定，参错变易，不可以年记，故列其月。”今案：秦楚之际，扰攘僭篡，运数又促，故以月纪事名表也。\*

太史公读秦楚之际，曰：初作难，发于陈涉；虐戾灭秦，自项氏；拨乱诛暴，平定海内，卒践帝祚，成于汉家。五年之闲，号令三嬗。①自生民以来，未始有受命若斯之亟②也。

注①集解音善。索隐古“禅”字，音市战反。三嬗，谓陈涉、项氏、汉高祖也。

注②索隐音己力反。亟训急也。

昔虞、夏之兴，积善累功数十年，德洽百姓，摄行政事，考之于天，①然后在位。汤、武之王，乃由契、后稷修仁行义十余世，不期而会孟津八百诸侯，犹以为未可，其后乃放弑。②秦起襄公，章于文、缪，献、孝之后，稍以蚕食六国，百有余载，至始皇乃能并冠带之伦。以德若彼，③用力如此，④盖一统若斯之难也。

注①集解韦昭曰：“谓舜受禅，在璇玑玉衡以齐七政。”

注②索隐后乃放杀。杀音弑，谓汤放桀，武王讨纣也。

注③索隐即契、后稷及秦襄公、文公、穆公也。

注④索隐谓汤、武及始皇。

秦既称帝，患兵革不休，以有诸侯也，于是无尺土之封，堕坏名城，销锋镝，①鉏豪桀，维万世②之安。然王迹之兴，起于闾巷，合从讨伐，轶于三代，乡秦之禁，适足以资贤者③为驱除难耳。故愤发其所为天下雄，④安在无土不王。⑤此乃传之所谓大圣乎？⑥岂非天哉，岂非天哉！非大圣孰能当此受命而帝者乎？

注①集解徐广曰：“一作‘鋌’。”索隐镝音的。注“鋌”字亦音的。案：秦销锋镝，作金人十二，以弱天下之兵也。

注②索隐维训度，谓计度令万代安也。

注③索隐乡秦之禁适足资贤者。乡音向，许亮反。谓秦前时之禁兵及不封树诸侯，适足以资后之贤者，即高帝也。言驱除患难耳。

注④索隐指汉高祖。

注⑤集解白虎通曰：“圣人无土不王，使舜不遭尧，当如夫子老于阙里也。”

注⑥索隐言高祖起布衣，卒传之天位，实所谓大圣。

【索隐述赞】秦失其鹿，鬪雄竞逐。狐鸣楚祠，龙兴沛谷。武臣自王，魏豹必复。田儋据齐，英布居六。项王主命，义帝见戮。以月系年，道悠运速。汹汹天下，瞻乌谁屋？真人霸上，卒享天禄。

-----  
YOUTH 整理